

**Selma ISIĆ**

*Društvo arhivskih zaposlenika TK/ JU Arhiv Tuzlanskog kantona  
selmaistic@yahoo.com*

UDK/UDC: 930.25(497.6 Tuzla)"2023" (047)

## **Izveštaj sa Međunarodne arhivske konferencije “4. TUZLANSKI ARHIVSKI DANI”, Tuzla, 29. i 30. septembar 2023. godine**

### **Conference Report from the International Archives Conference “4. TUZLANSKI ARHIVSKI DANI”, Tuzla, September 29 and 30, 2023.**

U organizaciji Društva arhivskih zaposlenika Tuzlanskog kantona, 29. i 30. septembra 2023. godine, u Hotelu “Salis” u Tuzli održana je Međunarodna arhivska konferencija “4. Tuzlanski arhivski dani”.<sup>1</sup> Konferencija je, kao i ranije, privukla izlagače iz različitih zemalja, uključujući Sloveniju, Hrvatsku, Srbiju, Crnu Goru i Bosnu i Hercegovinu, stvarajući tako preduslov za razmjenu znanja i iskustava, kao i usavršavanje u arhivskoj djelatnosti. U fokusu interesovanja Konferencije bila je tema: *Izazovi uspostavljanja sistema zaštite, upravljanja i korištenja elektronskih zapisa.*

Učešće u skupu su pored arhivskih radnika iz Bosne i Hercegovine uzeli i stručnjaci iz Slovenije, Hrvatske, Srbije i Crne Gore.

U ime Društva arhivskih zaposlenika Tuzlanskog kantona okupljenima se obratila predsjednica Organizacionog odbora Konferencije, Hatidža Fetahagić. Učesnike skupa pozdravili su i dr. Miroslav Novak, u ime Arhivskog društva Slovenije, dr. Dinko Čutura, u ime Hrvatskog državnog arhiva, dr. Silvija Babić, u ime Hrvatskog arhivističkog udruženja, Hajrudin Čuprija, direktor Arhiva Federacije Bosne i Hercegovine, Milena Popović Subić, u ime Arhiva Vojvodine, Marija Todorović,



<sup>1</sup> Informacije o održanoj Konferenciji možete naći na linku: <https://daztk.net/2023/10/03/odrzana-konferencija-4-tuzlanski-arhivski-dani/>.

u ime predsjednice Arhivističkog društva Srbije, te dr. Vlatka Lemić u ime ICARUS Hrvatske.

Pored konferencijskog dijela, posjetitelji su imali priliku prisustvovati promociji časopisa “Arhivski pogledi” br. 3<sup>2</sup>, godišnjaka koji publikuje Društvo arhivskih zaposlenika Tuzlanskog kantona. Časopis je namijenjen podizanju svijesti i edukaciji, te ističe važnost razvoja arhivistike u Bosni i Hercegovini, čime daje doprinos jačanju arhivske zajednice kroz promicanje istraživanja na polju arhivske djelatnosti, kao i razmjenu ideja među arhivskim stručnjacima. Promotori časopisa bili su izvr. prof. dr. Zdenka Semlić Rajh i doc. dr. Šefko Sulejmanović.



Prilog 2. Promocija časopisa “Arhivski pogledi”, br. 3.

U okviru Konferencije predstavljena je i izložba “Priče iz Arhiva”, koja je proistekla iz projekta Kreativne Europe CREARCH. Izložba je predstavila neuobičajen i inovativan pristup arhiviranju, razvoju nove publike i kreativnoj interpretaciji arhivskih izvora. Putem krativnog pripovijedanja, arhivski i baštinski stručnjaci oživjeli su arhivske zapise iz spremišta i posjetiteljima omogućili da dožive nove priče kroz različite medije i formate. Ovaj projekt, u kojem je ICARUS Hrvatska bio projektni partner, dodatno je produbio svijest o važnosti arhivske građe u suvremenom kontekstu.<sup>3</sup> O izložbi “Priče iz arhiva” govorila je dr. Vlatka Lemić, te prisutnima predstavila izložbu, ali i približila samu ideju i namjeru koja se krije iza projekta „Priče o arhivima”.

U radnom dijelu Konferencije, 30. septembra 2023. godine održane su dvije sesije. Izlagači su dijelili svoja iskustva i perspektive, iznoseći različite probleme, ali i donoseći različite ideje i rješenja o pitanjima koja se tiču digitalne arhivske prakse.

<sup>2</sup> Elektronska verzija časopisa dostupna na linku: <https://www.daztk.net/ARHIVSKIPOGLEDI3.pdf>.

<sup>3</sup> Više o „Pričama iz arhiva“ vidjeti na stranici <https://drive.google.com/file/d/1Ib9FiHYxYXTotzWkXZwrkDjdBPjnbsNx/view> (7.3.2024).

U okviru I sesije predstavljena su sljedeća izlaganja:

- Izr. prof. dr. Zdenka SEMLIČ RAJH, Zgodovinski arhiv Ljubljana (Slovenija), *Standardi i zahtjevi za upravljanje elektronskim zapisima*
- Izr. prof. dr. Miroslav NOVAK, Pokrajinski arhiv Maribor (Slovenija), *Digitalizacija u arhivima – savremeni izazovi arhivske teorije i prakse*
- Doc. dr. Vlatka LEMIĆ, ICARUS Hrvatska/Sveučilišta u Zagrebu (Hrvatska), *Digitalna pismenost i vještine u arhivima – međunarodne prakse i iskustva u unaprijeđenju kompetencija arhivskih stručnjaka*
- Milena POPOVIĆ SUBIĆ, Arhiv Vojvodine (Srbija), *Pravni okvir zaštite elektronskih dokumenata u Republici Srbiji*
- Mr. Jasmin JAJČEVIĆ, Arhiv Tuzlanskog kantona/Društvo arhivskih zaposlenika TK (Bosna i Hercegovina), *Elektronski ili papirni dokument: značaj, prednosti i nedostaci*

U okviru II sesije predstavljena su izlaganja:

- Mr. Spomenka PELIĆ, Kantonalni arhiv Travnik (Bosna i Hercegovina), *Sistem za automatsko upravljanje predmetima u sudovima (CMS) i arhivsko poslovanje*
- Adnan KALESIĆ, Historijski arhiv Sarajevo (Bosna i Hercegovina), *Istraživanje i digitalizacija arhivske građe i informativnih sredstava (iskustvo Arhiva Brčko)*



Prilog 3. Učesnici Konferencije "4. Tuzlanski arhivski dani".

- Maruška NENEZIĆ, Jelena MRŠULJA, Državni arhiv Crne Gore – Istorijski arhiv Kotor (Crna Gora) *Značaj digitalizacije austrougarskog katastra u Istorijskom arhivu Kotor za unaprijeđenje rada sa korisnicima u dokazne svrhe*
- Asmir ZEĆIĆ, Služba za arhiv Brčko distrikta Bosne i Hercegovine, Rasim KORAJAC, CEO Development Rožanica doo (Bosna i Hercegovina), *Rješenje za digitalizaciju arhivske građe, njenu sigurnost i pristupu podacima sa dvostrukim slojem zaštite*

- Taiba MEHMEDBEGOVIĆ, Arhiv Bosansko-podrinjskog kantona Goražde (Bosna i Hercegovina), *Goraždanska iskustva u radu sa elektronskim zapisima*
- Iz. prof. dr. Miroslav Novak je izlagao rad kolegice Špele VALADŽIJA, Pokrajinski arhiv Maribor (Slovenija), *Pokrajinski arhiv Maribor na usluzi ljudima – obnova i revitalizacija prostorija za korisnike*.

Pitanje izazova uspostavljanja sistema zaštite, upravljanja i korištenja elektronskih zapisa bila je tema koja je pobudila veliko zanimanje i otvorila nekoliko bitnih pitanja za arhivsku struku, o čemu se razvila konstruktivna diskusija. U diskusiju o temi su se uključili: Zdenka Semlič Rajh, Miroslav Novak, Milena Popović Subić, Vlatka Lemić, Dinko Čutura, Omer Zulić, Selma Isić. Na kraju dvodnevne konferencije i po okončanju diskusije doneseni su i zaključci Konferencije koji su istaknuli važnost posjedovanja posebnih znanja i sposobnosti u radu sa elektronskim zapisima, ali i posjedovanje odgovarajućih sredstava potrebnih za održavanje elektronskih zapisa i uspostavljanje sistema potrebnih za njihovu zaštitu i upravljanje.



Prilog 4. Zajednička fotografija učesnika Konferencije  
“4. Tuzlanski arhivski dani”.

Po svršetku prisutne je još jednom pozdravila i zahvalila im na učešću Hatidža Fetahagić, predsjednica Organizacionog odbora Konferencije “4. Tuzlanski arhivski dani”. Sumirala je zbivanja sa stručnog skupa i pozvala učesnike da i naredne godine uzmu učešće u Konferenciji.

Konferenciju su finansijski podržali Federalno ministarstvo obrazovanja i nauke Mostar i Ministarstvo kulture, sporta i mladih Tuzlanskog kantona, te Kabas d.o.o. Sarajevo koji je kao sponzor od samog početka podržavao projekat Tuzlanski arhivski dani.

Konferencija je bila i medijski dobro praćena kroz najave i vijesti o održavanju iste, te video priloge i emisije. Informacije o istim mogu se naći na

nekoliko portala u tuzlanskoj regiji<sup>4</sup>, kao i u video priložima snimljenim i emitovanim na lokalnim televizijskim kućama RTV TK i RTV7.<sup>5</sup>

U konačnici, "4. Tuzlanski arhivski dani" predstavljaju značajan korak ka unapređenju globalnog dijaloga o elektronskim arhivskim materijalima. Konferencija je pridonijela povezivanju arhivskih profesionalaca iz različitih zemalja, potičući razmjenu ideja i zajedničko suočavanje s izazovima digitalne transformacije arhivske prakse. Očuvanje pisanog kulturnog naslijeđa i kulturno-historijske baštine kroz stalnu brigu o elektronskim zapisima ostaje ključna misija arhivske zajednice.

---

<sup>4</sup> <https://tuzlainfo.ba/index.php/najava-dogadaja-2/item/217955-slijedeceg-vikenda-4-mejnarodna-arhivska-konferencija-tuzlanski-arhivski-dani/>; <https://enovosti.ba/video-odrzana-4-medunarodna-arhivska-konferencija-tuzlanski-arhivski-dani/>.

<sup>5</sup> [https://www.youtube.com/watch?v=lj0oLftBbwk&t=3s&ab\\_channel=RTV7Tuzla](https://www.youtube.com/watch?v=lj0oLftBbwk&t=3s&ab_channel=RTV7Tuzla;);  
[https://www.youtube.com/watch?v=22R2obv3ohk&ab\\_channel=RTVTK](https://www.youtube.com/watch?v=22R2obv3ohk&ab_channel=RTVTK).